

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09) i čl. 25. i 69. Statuta Općine Centar Sarajevo - Prečišćen tekst ("Službene novine Kantona Sarajevo", broj 23/04), Općinski načelnik donosi

ODLUKU O KRITERIJIMA I NAČINU DODJELE SREDSTAVA ZA AKTIVIZAM MLADIH OPĆINE CENTAR SARAJEVO

I - OPĆE ODREDBE

Član 1.

Ovom Odlukom utvrđuju se kriteriji, način i postupak raspodjele budžetskih sredstava Općine Centar Sarajevo (u daljem tekstu: Općine) iz granta za aktivizam mladih.

Član 2.

Aktivizam mladih predstavlja društveni angažman mladih koji su okupljeni oko neke zajedničke ideje i koji kroz zajedničko umrežavanje učestvuju u sprovođenju određenih projekata. Glavni cilj aktivizma je unapređenje kvaliteta života mladih, sticanje kompetencija i rješavanje relevantnih pitanja doprinoseći društvu kako u lokalnim zajednicama, tako i na državnom nivou. Kroz aktivno učešće, mladi doprinose društvu, a to može podrazumijevati aktivizam u lokalnoj zajednici a također i na kantonalnom, federalnom i državnom nivou.

II – PRAVA I OBAVEZE

Član 3.

Pravo na dodjelu sredstava iz ovog granta mogu ostvariti:

- a) Osnovne škole, srednje škole i visokoškolske ustanove sa područja općine Centar Sarajevo;
- b) Udruženja srednjoškolaca, studenata i udruženja registrovana na području općine Centar čije članstvo i organe upravljanja čine dvije trećine (2/3) mladih, čije su aktivnosti i statutarne djelatnosti većinom usmjerene na mlade.

Član 4.

- (1) Sredstva iz granta za aktivizam dodjeljivat će se za finansiranje odlaska na ekskurzije, ljetne škole, studentska putovanja i slične skupove.
- (2) Sredstva iz člana 1. ove Odluke dodjeljivat će se na osnovu podnesenih zahtjeva, a u skladu sa objavljenim javnim pozivom.
- (3) Javni poziv se objavljuje na web stranici Općine Centar i ostaje otvoren do kraja tekuće godine odnosno do utroška sredstava planiranih za ovu namjenu.
- (4) Zahtjevi za finansiranje se dostavljaju službi nadležnoj za obrazovanje, kulturu, sport i mlade (u daljem tekstu: Službi), elektronskim putem ili putem protokola Općine Centar Sarajevo.
- (5) Zahtjev se podnosi najmanje petnaest (15) dana prije odlaska na aktivnost koja se finansira.

Član 5.

- (1) Dostavljeni zahtjevi će se rješavati po vremenu prispjeća.
- (2) Služba je dužna u roku od dvadeset dana obavijestiti podnosioca zahtjeva o odluci i istu je dužna obrazložiti.
- (3) Korisnici sredstava obavezuju se da će sa svojim radno sposobnim učenicima/studentima učestvovati u ekološkim akcijama čišćenja javnih površina koje organizuje i provodi lokalna zajednica kao i u drugim aktivnostima koje utiču na podizanje ekološke svijesti mladih, kao i za ostale aktivnosti lokalne zajednice.

Član 6.

Uz zahtjev je potrebno priložiti slijedeće dokumente (original ili ovjerene kopije):

- a) Dokaz da je aktivnost planirana godišnjim planom i programom rada, a sve u skladu sa odredbama pravilnika o organizaciji i realizaciji izleta, studijskih posjeta, ekskurzija, kampovanja/logorovanja, društveno/korisnog rada, škole u prirodi i drugih oblika odgojno-obrazovnog rada u osnovnoj i srednjoj školi ("Službene novine Kantona Sarajevo", broj 36/10 i 04/16).
- b) dokaz o registraciji udruženja.
- c) Motivaciono pismo za učešće u aktivnosti, ako se radi o ljetnoj školi i takmičenju.

Član 7.

- (1) Iznos nepovratnih sredstava u jednoj godini iznosi:
 - a) do 2.000,00 KM za putne troškove odlaska na ekskurziju za srednje škole;
 - b) do 1.500,00 KM za studente za odlaske na takmičenja i ljetnu školu.
- (2) Neiskorištena sredstva iz granata za aktivizam u jednoj godini se prenose u narednu godinu.

Član 8.

- (1) Sredstva iz granta za aktivizam mladih neće se izdvajati za troškove učešća i putovanja na stranačke treninge, konferencije i kampanje, niti bilo koje aktivnosti u i van Bosne i Hercegovine, a koje organizuju domaće i inostrane političke stranke.
- (2) Podnosilac zahtjeva može aplicirati samo jednom u toku kalendarske godine.

Član 9.

Korisnici sredstava koji ne obezbijede angažman koji će zajedno realizirati kao vid ekološke akcije radno sposobnih učenika/studenata ubuduće neće moći koristiti sredstva za aktivizam mladih, kao ni druga sredstva predviđena grantom za mlade.

III - PRELAZNE I ZAVRŠNE ODREDBE

Član 10.

Stupanjem na snagu ove Odluke prestaje da važi Odluka o dodjeli sredstava iz granta za aktivizam mladih Općine Centar Sarajevo („Službene novine Kantona Sarajevo, broj 29/18 i 4/20).

Član 11.

Ova Odluka stupa na snagu narednog dana od dana objavljivanja na Oglasnoj ploči Općine, s tim da će se naknadno objaviti u "Službenim novinama Kantona Sarajevo".

Broj: 13/11-2199/23

Datum: 27.03.2023

